

欽定剿平粵匪方略

欽定剿平粵匪方略卷三百二十一 壬戌年

閏八月十八日 戊戌 李鴻章奏言八月中旬署甯

紹台道史致諤由皖來滬正與 臣 籌商軍餉事

宜據甯波府知府林鈞稟報叛兵勾引髮逆攻
撲姚城雖經擊退恐該逆更圖旁竄該道隨於
二十三日與副將華爾同坐輪船駛往甯郡旋
據史致諤稟稱賊匪大股勾結廣匪於八月二

十五日突入慈谿縣城當商同華爾將駐守姚
邑之勇抽調數百名來甯幫同保護續據蘇松
太道吳煦稟稱華爾於抵甯後聞慈谿復失卽
於二十六日督帶常勝軍駛至半浦距慈谿二
十餘里由陸路進兵二十七日親赴城下率衆
登城該副將在後督隊不期賊從城上放槍適
中華爾胸腕登時暈倒通事扶救回船其時派

令登城之常勝軍已一擁冒煙直上賊匪紛紛
潰敗我兵擒斬甚衆立將慈谿縣城克復華爾
受傷回船自知不救飛棹回郡因慈谿守兵太
單復指調防甯之常勝軍二百六十名馳赴防
守二十八日華爾傷重殞命各等情查甯波正
值喫緊常勝軍未便遣散華爾遺言擬暫交白
齊文法思爾得會同管帶相應奏明請

旨定奪再副將華爾係美國部落鈕要人咸豐十年
經吳煦雇令管帶印度兵隨攻嘉定太倉並兩
次攻克松江府城旋據稟願隸中國版圖吳煦
留令管帶常勝軍協守松江本年正月率五百
人破賊十餘萬於松江之迎禧濱天馬山等處
以少勝多功績最奇復邀同英法二國之兵攻
毀高橋等處賊壘疊沐

恩施以副將補用自臣抵滬受事該副將頗遵調遣
屢次派令會勦金山衛城進攻劉河逆匪所向
克捷又奮力攻克青浦並有力圖掃蕩蘇城賊
匪之議似此忠勇性成難能可貴臣已督令吳
照等改爲中國冠裳易棺收殮葬於松江以至
其效命

中朝之志華爾於松江甯波戰功尤著此次攻克慈

谿中槍殞命可嘉可憫懇

恩飭部從優議卹並於甯波松江兩處建立專祠以

慰忠魂

同日左宗棠奏冒逆賊李侍賢自遂安擊敗後
復糾合金華悍賊於南岸湖鎮羅埠北岸蘭谿
縣屬之永昌鎮太平祝家孟塘油埠裘家堰等
處屯踞意在俟官軍深入卽乘虛襲我後路臣

當飭劉培元等軍於龍游城西十里之圭塘山
駐紮飭總兵崔大光率四營於龍游城北對河
之恭圩地方駐紮臣率親兵駐離城十五里之
譚石望地方爲兩路策應另檄臬司劉典率馬
步十一營駐龍游屬之高橋專事截剿援賊七
月十六日各營行至東門橋適侍逆李侍賢率
賊千餘前來探路楊鼎勳等率所部攔橋截擊

互有殺傷賊見我軍後隊踵至始行遁走十七日我軍進攻油埠賊巢劉典等分路進兵賊欲從旁來抄經楊鼎勳等突出擊之遂皆奪路狂奔我軍三路齊進追殺十餘里共斃長髮悍逆千數百名生擒百餘名陣斬鄧積仕等賊目數十名該逆自油埠擊敗後退踞太平祝家裘家堰孟塘等處勾結自固二十一至二十四等日

劉典率各營分兩路進剿其由右路進者先燒燬賊巢五處直撲裘家堰賊巢壘已垂破忽後路援賊繼至李良平身受礮傷賊仍退併入壘其由左路進者行近孟塘賊分數路抗拒李耀南率所部當先衝殺楊鼎勳繼之鏖戰兩時斃執旗賊目數名賊勢少卻忽另股從左右兩路抄來楊昌濬一面分軍堵禦一面令楊鼎勳督

隊向前正鏖戰間各軍星速馳援賊乃潰退我
軍亦收隊而還臣查太平祝家等處與南岸羅
埠湖鎮之賊相爲犄角意在死守金華蘭湯諸
城以阻我軍進攻之路臣軍戰船尙未造齊不
能扼截金華河路尙難制賊死命侍逆李侍賢
屢經勦敗兇燄已衰近以金陵首逆屢召赴援
因臣軍苦於相持未能猝脫如蔣益澧一軍旬

日內趕到必可痛予殲除臣之一軍因疫病故者甚多每次接仗不能派六成之隊而各路賊黨方源源而來不得不慎以圖之

左宗棠又奏言溫台處之賊盡聚金華一郡逆首李侍賢挑其悍黨屯踞蘭谿屬之油埠等處近日因與廣東賊不睦令其分踞嚴郡昨又噉新到之賊分踞壽昌近城各鄉賊蹤偏重北路

李侍賢詭計似阻我師進攻金華而覓路竄皖
南以赴金陵賊渠之召臣已密致曾國藩豫飭
徽甯守將嚴爲扼截並飭卽選道王文瑞等扼
守遂安一路以撓其謀一面飛催蔣益澧督所
部星速赴浙以便分道截剿蔣益澧聞於八月
初二日自長沙啟行其前隊此時計抵廣信臣
飛飭其速進常山聽候調遣均奏入

上命議政王軍機大臣傳諭曾國藩薛煥李鴻章左宗棠曰常勝軍素稱得力白齊文等能否勝任不可不豫行籌及著薛煥李鴻章悉心察度毋貽後患甯波爲沿海要郡慈谿雖復而兵力甚單該郡防守情形仍形喫緊左宗棠務當隨時妥籌李鴻章亦當不分畛域力爲兼顧本日據左宗棠奏李逆挑悍黨屯踞蘭谿屬之油埠等處近與廣東賊

不睦令其分踞嚴郡又嗾新到之賊分踞壽昌似
阻我師進攻金華覓路竄皖南以赴金陵已密致
曾國藩豫防徽甯並飭王文瑞等嚴扼遂安飛催
蔣益澧星馳赴浙等語所籌甚中竊要李逆圖赴
金陵久有此計而徽甯爲金陵上游若復被賊竄
入非獨金陵大營掣動卽安慶亦復戒嚴諒曾國
藩早已籌畫嚴飭守將妥慎防堵蔣益澧前隊計

抵廣信何以如此行走遲滯實屬遷延著卽飛催
剋期赴浙以資攻勦左宗棠營內近爲疾疫所苦
該將士征役勞瘁甚爲憫惻著卽妥爲拊循毋令
失所鮑超營內並金陵徽防各營近來疫氣已否
平安軫念實深廣德州情形現在若何著曾國藩
查明具奏

上諭內閣曰副將華爾以美國部落之人願隸中國

版圖在上海隨同官軍進攻嘉定太倉克復松江
府城復能破賊於松江之迎禧濱等處朝廷嘉其
戰功疊沛恩施以副將擢用茲據李鴻章奏浙江
逆匪攻陷慈谿華爾聞信卽管帶常勝軍進剿賊
從城上放槍適中華爾胸腕登時暈倒當經華爾
所帶常勝軍將慈谿縣城克復華爾回甯波後於
次日殞命等語覽奏實深嘉憫現經李鴻章飭令

吳煦等妥爲殮葬並著於甯波松江兩府建立專祠仍交部從優議卹以慰忠魂

二十日

庚子

吳棠奏冒欽奉

上諭以湖面防務緊要飭臣隨時查察臣前准都興阿函稱親赴泰靖一帶布置回營後派撥陸隊並飭總兵吳全美督帶水師下駛防扼通靖江而備禦已臻周密惟沿江各口港汊紛歧臣現

擬於成子河駐防水師內抽撥礮船二十八隻
派參將楊德榮等管帶前赴通海隨同都興阿
所派師船協力防剿至高寶湖而爲揚營後路
並係北路屏蔽當此揚營分軍防江則湖防更
關緊要查總兵黃國瑞於軍務機宜最爲敏練
前經派駐邳宿現在黃開榜赴徐於該處尙可
兼顧所有運河礮船已派參將王振標管帶歸

黃開榜節制又調回駐海巡緝之參將張祖璽
帶領邳宿陸隊與水師互相策應併力防河一
面卽飭黃國瑞帶所部陸隊一千名移紮高寶
專辦湖防其都司黃中理所帶礮船亦歸統帶
如此量爲更動上下游均資聯絡堪以仰慰

宸懷奏八

上命議政王軍機大臣傳諭吳棠曰裏下河完善之

區久爲髮逆垂涎屢據都興阿奏到江陰福山等處賊船甚多並聞該逆改造廣艇密造官軍旗幟以圖北竄是刻下江防至關緊要吳棠現於成子河駐防水師內抽撥礮船二十八隻飭楊德榮等管帶前赴通海惟江面港汊紛歧吳棠務飭該參將等會同都興阿所派吳全美師船上下梭巡聯絡策應以杜該逆北竄之路其高寶湖面爲揚營

後路該署漕督已派水路各隊防守邳宿運河以
黃國瑞所部陸隊一千名移紮高寶專辦湖防其
黃中理所部礮船並歸統帶布置均尙周妥仍飭
在防各員實力整頓以資堵剿

同日總理各國事務衙門奏言前據法國哥士
耆函稱甯波一帶危急議令本國副將勒伯勒
東赴甯防守臣等告以法國兵丁雖稱勇往但

不諳地方形勢非歸中國大員調度恐意見歧
出殊於行軍未宜卽如副將華爾曾經具呈願
隸中國故能屢次戰捷面覆去後昨據法國照
會勒伯勒東現今暫離本國水師參將權受中
國職任請飭備印信文憑給與該副將爲署理
浙江總兵之據聽浙江巡撫及甯波道節制各
等語查法國因甯波海口緊要願將本國官員

歸中國大員節制具見和好真忱惟該副將既歸該省大員節制自應由該省督撫給付札憑以一事權相應請

旨飭下通商大臣薛煥江蘇巡撫李鴻章浙江巡撫左宗棠查照辦理該副將勒伯勒東在甯波所練中國兵丁共計一千五百名應給餉項當按照舊章支放不宜扣減該副將既受中國職任

單之與國不明三十二
卽應遇事持平按照中國法制辦理不得稍有
偏倚亦不准稍有寬縱以肅軍律應請一併

飭下薛煥等妥籌章程秉公約束用資防守奏入

上命議政王軍機大臣傳諭薛煥李鴻章左宗棠曰
法國因甯波海口喫緊願將伊國副將勒伯勒東
權受中國職任帶兵防剿是其願爲中國出力以
敦和好之忱惟用外國之兵以剿賊必須聽受中

國節制現由總理各國事務衙門與之定議該國
情願以勒伯勒東權受中國職任聽浙江巡撫及
甯波道節制著薛煥李鴻章左宗棠將該副將在
甯波所練中國兵丁一千五百名應給餉項卽行
按照舊章支放並據恭親王等奏稱該副將旣歸
該省大員節制卽應由該省巡撫給付札憑以一
事權著薛煥李鴻章左宗棠等悉心妥籌或由李

鴻章或由左宗棠發給勒伯勒東札付方免紛歧
遲誤該副將既受中國職任卽應遇事持平辦理
一切按照中國法制不得稍存偏倚亦不得稍有
寬縱史致謬甫到甯郡未知於該處情形能否諳
悉薛煥等督飭該道於該副將所領之軍及甯郡
兵勇賞功罰罪以及稟報戰守各情務令秉公覈
實辦理不得稍有齟齬致誤機宜

二十一日辛丑曾國藩奏言皖北形勢以淮水爲

綱領前此髮匪盛於淮南捻匪擾於淮北袁甲
三駐紮臨淮跨兩淮而處其中頃大江以北長
淮以南業已肅清然唐訓方暫署皖撫仍應駐
紮臨淮以資控制西可聯絡蔣凝學壽穎之師
東可聯絡吳棠清江之師南可聯絡石清吉廬
州之師李世忠滁州之師卽北路亦可稍助僧

格林沁之聲援若不駐臨淮則中段空虛恐徐宿蒙亳各捻又將窺伺淮南關繫甚大不可不防聞唐訓方於閏八月中旬由鄂起程來皖俟其到省臣當與之熟商接統袁甲三之軍汰弱留強與楚軍聯爲一氣庶可防剿兼施

同日袁甲三奏言臣自本年三月至今病勢有增無減臣子翰林院侍講袁保恆前自長淮衛

調回臨淮侍臣湯藥一切軍事臣未能躬親者
令袁保恆稟命而行尙無貽誤嗣袁保恆於本
月初八日聞訃丁母憂奔喪哀迫且臣母現年
八十六歲體弱多病日夕倚閨雖臣烏鳥私情
不應上瀆

天聽而以久病之軀當鉅艱之任設或捻匪聞而生
心致有疏虞恐又貽

聖主南顧之憂此臣病不能久留之苦衷也唐訓方
謀略素嫻久爲臣所深知相應請

旨飭催唐訓方星夜兼程來臨接辦軍務所有

欽差大臣關防是否卽交唐訓方暫署抑封送會國
藩存儲俟李續宜銷假回皖再行接受之處恭
候

欽定抑臣更有請者署安徽布政使馬新貽在皖日

久熟悉情形於北路防剿亦甚諳練又與臣營
兵將相習可否請

旨於唐訓方未到以前卽令馬新貽暫統臨軍以重
防剿而定兵心臣俟布置稍定卽帶同袁保恆
起程回籍仍俟病體稍痊再圖報效均奏入

上命議政王軍機大臣傳諭曾國藩袁甲三唐訓方
馬新貽日前因李續宜給假回籍唐訓方署理皖

撫恐其一切情形尙未熟悉諭令袁甲三仍當力
疾從公妥籌辦理欽差大臣關防仍俟李續宜假
滿回皖再行交卸茲據奏稱病體支離勢難撐持
請催唐訓方迅速來臨並先令馬新貽暫統臨軍
等語自屬實在情形馬新貽在皖日久情形熟悉
著卽將臨淮軍務暫交馬新貽統率以重防剿而
定兵心袁甲三俟馬新貽到後布置稍定准其帶

同袁保恆起程回籍調理其欽差大臣關防著卽封交馬新貽收存曾國藩於皖北軍務仍應妥籌兼顧督飭馬新貽認真料理唐訓方已自鄂起程著卽星速前往毋稍遲誤

曾國藩又奏言大江南岸各軍疾疫盛行甯國所屬最甚金陵次之徽州衢州次之水師及上海蕪湖各軍皆疫厲繁興死亡相繼鮑超一軍

現病者六千六百七十人其已死者數千尙未
查得確數甯國府城內外屍骸狼藉無人收埋
病者無人傳藥甚至一棚之內無人炊爨軍中
著名猛將如黃慶伍華瀚等先後物故鮑超亦
染病甚重張運蘭一軍駐紮太平旌德等處病
者尤多卽求一繕稟之書識送信之夫役亦難
其人張運蘭送其弟之櫬至祁門亦自患病尙

難回營楊岳斌自揚州歸來亦抱重病天降大
戾近世罕聞惡耗頻來心膽俱碎設有大股賊
匪撲犯甯國旌太等處鮑超張運蘭兩軍不特
不能出隊迎戰並不能堅守城壘若撲犯金陵
徽州亦深恐病者太多戰守皆無把握皖南藩
籬一壞則江西內地空虛毫無足恃袁甲三李
續宜皆將回籍唐訓方新來諸事且萃於臣一

人之身臣自揣薄德不足以挽厄運菲才不足以支危局合無籲懇

天恩簡派在京親信大臣馳赴大江以南與臣會辦諸務臣亦竭力經營以期補救於萬一奏入

上命議政王軍機大臣傳諭曾國藩曰大江南岸各軍疾疫盛行前據該大臣奏到卽深軫念茲據奏稱近日各軍皆以厲疫死亡相繼著名猛將如黃

慶伍華瀚等先後物故鮑超與張運蘭楊岳斌等
均抱病軍中甚至炊爨寥寥覽奏尤深塵念此時
戰守均無把握自屬實在情形惟據奏懇請由京
簡派親信大臣前往會辦諒該大臣亦爲憂勞焦
灼所迫朝廷信用楚軍以曾國藩忠勇發於至誠
推心置腹倚以挽救東南全局各軍將士疲病之
餘詎忍重加督責該大臣惟宜愈矢忠誠加意拊

循庶使軍心益固各營病疫將士其各傳旨優加
存問當此艱危時勢疾疫流行係無可如何之事
非該大臣一人之咎意者朝廷政事多有闕失以
至上干天和我君臣當痛自刻責實力實心爲民
請命以冀天心轉移事機就順

二十二日

壬寅

都興阿奏言遵查總兵李德麟久

帶水師派令專防狼福江面責任重大雖因許

浦等處賊船游弋親往掩捕順赴上海惟不先行報明擅離防所實屬不知慎重咎有應得相應請

旨將李德麟卽行革職仍留水師軍營交黃彬差遣以贖前愆至江防布置昨據總兵吳全美親督各營至蘆涇港等處察看情形扼要駐泊均屬周妥惟思狼福江面極寬許浦等處又有匪船

往來江南逆匪時圖北竄南北兩岸均須厚集
師船方足以壯聲勢總兵黃彬現已抽調師船
分撥下駛嚴密備禦惟據探江南逆勢甚重忠
逆在蘇常等處調賊數萬由東壩溧水圖犯我
軍蘇杭內河該逆添造礮船已齊並買洋礮甚
多分撥逆衆於福山江陰諫壁丹徒等處江口
聞上游見仗卽分投出竄等語

臣

當飭各營嚴

加防範並飭遊擊胡世英等緊守隘口扼賊紛
竄之路再臣前因沿江師船不敷攻剿擬派員
赴楚製造長龍礮船現已札委總兵李起高道
員蕭汝蓀一同赴楚俟船隻造齊東下即便進
剿

都興阿又奏言接會國荃函稱近日所部勇丁
因病物故者不少鮑超軍中病者亦多恐兩月

之內尙難拔營現聞侍忠兩曾約集來援金陵
已蠢蠢欲動囑爲請

旨飭多隆阿迅速東來渡江會剿等情察其來函詞
意甚爲迫切可否

飭下多隆阿督兵東下會攻金陵以資厚集奏入
上命議政王軍機大臣傳諭都興阿曰江南布置情
形旣據黃彬等撥船防範卽飭該將弁等妥爲防

聖令其勉力拊循用維大局

上又命議政王軍機大臣傳諭官文多隆阿曰都興
阿奏曾國荃近日所部勇丁因病物故者不少鮑
超軍中病者亦多現聞侍忠兩逆約集來援金陵
已蠢蠢欲動等語江南情形萬分緊急有必須多
隆阿一軍前往助剿之勢而多隆阿尙爲陝豫邊
防牽掣必須接替有人方能統兵東下鄂省文武

員弁知兵者不少如金國琛梁作楫何紹彩等均
累著戰功著官文察看情形有能接替多隆阿者
卽飭令統帶兵勇馳赴楚豫之交會同豫省將弁
迅將陳德才一股併力殄除並駐軍楚豫邊境堵
截入陝擒匪俾多隆阿得以統領全軍徑赴江南
會合曾國荃之師進圖金陵官文多隆阿忠誠體
國諒必能移緩就急無誤事機

上諭內閣曰前因總兵李德麟擅自帶船離營赴滬
諭令都興阿查明叅辦茲據奏稱查明李德麟因
乘船捕盜順赴上海等語該總兵雖因捕盜起見
究未行報明竟離防所實屬咎有應得李德麟著
卽革職仍留水師軍營交黃彬差遣以贖前愆

都興阿又奏言臣向有肝疾近日增劇左目現
有蒙翳扶掖需人竊思揚防一軍極關緊要儻

有貽誤臣固罪無可辭而關係大局實非淺鮮
近聞前任幫辦江北軍務富明阿現升都統在
京供職查該都統聲望素隆江北軍民咸深感
戴儻荷

聖恩飭富明阿來揚督辦於刻下軍情大有裨益臣
亦未敢置身事外仍當在營盡心佐理奏入

上諭內閣曰正紅旗漢軍都統富明阿著馳驛前往

揚州軍營辦都興阿軍務

欽定剿平粵匪方略卷三百二十二 壬戌年

閏八月二十三日 癸卯 官文嚴樹森奏言豫省髮

逆由浙川廳一帶糾合捻匪數萬竄犯楚境八月十七日逆賊馬步四五萬圍撲光化縣城及老河口市鎮蔓延三四十里幸豫派總兵成得升等分投布置靜以待動該逆偪近城濠衆軍水陸迎擊槍礮環施轟斃步賊七八百名黃衣

騎賊數十名賊衆敗退十八日該逆復出大股
擁擁前來我軍陸師分兩翼迎擊水師上下抄
截連開大礮轟斃賊數百名及騎馬賊目數十
名賊仍敗回土壘伐木紮箚從上流潛渡圖抄
官軍之後衆軍併力夾擊焚燬賊箚數座礮斃
水路之賊百餘名落水死者無數岸上之賊亦
同時潰敗該地方文武因城圍已解酌留隊伍

防守城池是日酉刻成得升等各率所部連夜
追勦老河口市鎮賊營乘賊不備各路兵勇齊
進大呼殺賊聲震山谷格斃悍賊多名焚賊營
帳棚數十處賊衆奪路狂竄成得升等躍馬揮
戈率同兵勇追殺二十餘里斃賊千餘名生擒
百餘名內有僞丞相指揮多名均訊明正法釋
放難民千餘名老河口市鎮肅清敗賊分爲兩

股一由晉公廟分竄張家集等處一由陳家埠
分竄黑龍集等處大股尙在竹林橋均近偃襄
樊查此股髮逆自陳四眼狗伏誅後窮無所歸
前因南陽之圍深忿楚軍擊敗遂糾集捻黨蓄
謀犯楚仰賴

天威迅速擊退城市均獲保全惟餘逆竄近襄樊亟
應戰守兼籌迅殄狂寇現留成得升等仍紮老

河口卽調道員梁作楫馬步各隊回軍襄郡會
同金國琛所部各營合力勦辦並咨會顏朝斌
督同在防文武將襄樊守禦事宜妥籌布置

官文又奏言欽奉

諭旨令勝保辦理渭河以北軍務多隆阿保守西安
兼辦理商南潼關及渭河以南軍務自應欽遵辦
理惟軍情朝夕變幻多隆阿折回浙川荊子關

一帶勦辦髮逆已獲勝仗髮逆糾合捻股狂奔
老河口又經楚軍擊敗下竄刻下武關一路情
形稍鬆臣已飛咨多隆阿仍赴西安酌度情形
先其所急總以保全陝省爲勝算兼顧商南武
關一路以防髮逆西竄惟潼關係同州所屬離
渭河僅七十里應請

飭下勝保就近防勦多隆阿仍遵

旨同勝保一體節制陝西各營俾南北軍務和衷會辦以期殄滅醜類奏入

上命議政王軍機大臣傳諭官文多隆阿曰多隆阿一軍自馳抵商維後嚴扼要隘屢挫賊氛近因陝防較鬆准令馳赴楚豫之交迅將陳得才殄滅再行入陝會剿至江南各營兵力本厚近來疾疫盛行戰守均無把握深恐一有疏虞全功盡棄急思

抽調多隆阿勁旅前往助剿是以諭令官文多隆
阿斟酌辦理此時若卽令多隆阿帶兵入陝恐陳
得才一股又將復熾深爲楚豫之憂且朝令暮改
該將軍無所適從轉致貽誤軍情且夕變遷官文
此奏自係尙未深知近日情形著卽會商多隆阿
探明陝西江南何路軍情緊要先其所急奏請移
兵會剿仍一面於鄂省中得力將弁可以接替多

隆阿者飭令統帶兵勇將陳德才一股併力殄除
並駐軍於楚豫邊界堵截入陝擒匪俾多隆阿全
軍可南可北得以迅殄逆氛竄撲光化老河口髮
逆業經官軍擊退其籌辦襄鄖防剿事宜卽著照
官文所擬飭令梁作楫金國琛等督率各營合力
剿辦

上諭內閣曰南陽髮逆糾集捻黨圍撲湖北光化縣

城竄擾老河口市鎮經官文等豫派總兵成得升等分投布置督隊壓追斃賊無數城圍遂解官軍連夜進剿老河口市鎮賊營先後斃賊千餘名生擒百餘名餘匪向襄樊一帶敗逃老河口市鎮一律肅清仍著官文等飭令各將弁探賊所向實力堵剿迅掃逆氛

同日鄭元善奏言豫署臬司洪貞謙等稟報粵

逆於八月初六日圍攻浙川廳城嚴守九日賊
由李官橋遁竄十八日分股由馬磴擾及荆子
關該處向無城池署副將德培帶領弁兵五十
餘名於要隘防剿奈兵單不成隊伍鄉團亦不
得力致沿河西岸被匪焚掠二十二日多隆阿
派兵追剿立時克復該匪分爲兩股其竄湖北
已過白河者爲僞扶王其由荆子關至商雒者

爲僞啟王竄陝股匪經多隆阿之軍屢次剿擊
旋即折回鄧州之厚坡等處圍撲鄧州新野縣
城侵及唐縣洪貞謙先期飭遊擊任治國等探
蹤前進閏八月初六日馳抵新野遇匪接仗逆
衆驚潰向東南狂奔衆軍或從旁抄擊或躡後
進剿沿途斃匪甚多初九日追至郭灘以南二
十里唐河北岸該匪正在搶渡見官兵追及列

仗抗拒我軍並鄉團分三路衝殺槍礮齊施共斃賊二三千名生擒五十三名落水淹斃者無數敗匪向楚北棗隨一帶紛竄我軍收隊回紮唐縣正擬會合楚師殄除狂寇又接內鄉縣知縣稟稱皖捻姜台凌等股竄至該縣之重陽店一帶將撲縣城又有另股竄近盧氏之朱陽關勢將東竄等情查粵匪狡猾窮無歸宿近又勾

結擒匪旁竄內鄉盧氏非圖擾鎮內再撲宛城
必取道葉裕以作歸計此時宛郡情形誠屬喫
緊臣已飛飭洪貞謙檄調唐鄧各境團練施榮
交界以防粵匪回竄一面分布兵勇於葉裕各
境擇要防剿又飛催副將余際昌迅速赴宛會
同扼擊副將楊長春督飭各營卽日出盧氏跟
蹤緊蹙實力痛剿臣惟有殫竭血誠力求整頓

以期早靖兇氛

同日毛昶熙奏言南路髮逆被擊竄往楚省隨
棗一帶其捻逆之竄赴商南者經多隆阿扼剿
獲勝回竄內鄉撫臣現飭副將楊長春督隊追
剿而南陽亦有官兵截擊似可無虞省城防務
較前已鬆並聞永宿一帶漸次肅清僧格林沁
不日督兵前進臣酌量緩急不敢以有用之兵

置之無用之地擬將原帶兵勇親督馳回歸德
軍營聽候僧格林沁調度迅掃逆氛均奏入

上命議政王軍機大臣傳諭僧格林沁鄭元善毛永
熙曰粵逆僞扶王等分股竄擾鄧州新野等處鄭
元善督飭洪貞謙等帶兵追躡該逆竄向棗隨一
帶其捻匪姜台凌等股由商南敗竄內鄉衆尙數
萬另設竄過盧氏朱陽關亟宜厚集兵力四面堵

擊著鄭元善卽嚴飭洪貞謙楊長春等軍認真攻
勦務將此股竄匪悉數殲除如再不振刷精神迅
殲醜類定將該員弁等從重治罪該撫立予嚴譴
毛昶熙督辦河南團練責有攸歸豫省情形糜爛
至此該侍郎豈竟毫無策應著卽激勵鄉團沿途
截殺以輔兵力所不逮該匪如被勦情急勢必東
駛回巢著僧格林沁探明賊蹤所向派撥馬隊相

機截勦毋令竄越據官文等奏髮逆竄近襄樊現在派兵迎勦鄭元善已飭洪貞謙扼紮唐鄧交界以防回竄仍當酌度緩急如粵匪勢尙狹猖卽遣派勁兵交洪貞謙馳赴楚境合力攻勦不得株守交界處所致誤專機汴城防務已鬆毛昶熙自應回宋惟宋營弁勇不甚得力該營業歸僧格林沁調度著該親王隨時整飭俾成有用之師豫省餉

時寇蹤充斥文報不通迫多隆阿進兵擊退始
據該地方文武稟報以致入奏遲延實深惶悚
至署副將德培於所屬關隘被匪竄踞雖係賊
衆兵單究屬守禦不力應請

旨將署荆子關協副將德培革職留營以觀後效奏
入

上諭內閣曰河南署荆子關協副將德培於所屬關

隘被匪竄陷雖係賊衆兵單究屬堵禦不力德培
著卽行革職暫留軍營以觀後效

同日江西道監察御史孟傳金奏言軍興以來
凡兵差過境前期數日地方官卽出印票縱容
書役各處拏車牛驢搜羅殆盡得賄卽行放免
無錢悉爲扣留其扣留之車馬若不設法賄免
卽作爲雇用實則並未發價從此各站截留永

無回鄉之日至鋪戶人等無車可拏按戶勒派
錢文臨期又將沿途各旅店悉行封占各店戶
如敢抗違立予封閉他項差務指名捏稱無不
如此每逢徵調在

皇上諄諄訓戒惟恐有妨民時乃貪官污吏反藉以
作威苛斂彼此分肥雖民間據實控告而同官
代爲開脫大吏曲爲優容窮黎呼籲無門實堪

矜憫查軍需則例本極詳明何難妥爲遵辦乃
開銷之浮冒則必託例而行供應之疲繁則多
違例而取相應請

旨飭下各直省督撫嚴諭所屬嗣後凡遇兵差過境
務須遵照定例其無車馬處所折價發給不准
擾累商民如有縱容書役妄拏平民車馬指官
勒索藉端科派等弊一經發覺或被人控告卽

將該官役等嚴叅治罪並將徇隱之上司議處
至行軍之要首重紀律未有約束不嚴而能克
敵致勝者近聞出征兵弁甫離汛營卽強橫無
忌每將行旅車馬攔阻使之換給騎坐經過州
縣先行羣入衙署訛索規費業已備車又思折
價旣已折價又索雜支稍不遂意卽詈官毆役
揭案興堂必滿其欲而後已至於橫行街市欺

侮商民更無論已並請

旨飭下帶兵各員務各申明軍律所經地方除照例
供給外一概不准騷擾如有恃衆橫行詐索強
取各情一經查出卽將該兵弁按照軍法從事
奏八

上諭內閣曰軍興以來徵調頻繁兵差絡繹各省地
方官吏果能仰體朝廷軫恤閭閻之意實心籌辦

何至上蝕軍儲下妨民務無如骸地方官結習已
深每逢兵差過境前期數日卽出印票縱役拏車
牛驢搜羅殆盡得賄卽行放免無錢悉予扣留其
扣留之車馬又必設法賄求始有回鄉之日至於
鋪戶人等則按戶派錢臨期又將各店戶封占如
敢抗違立行封閉他項差務亦多類是國家命將
出師原冀拯民水火而貪官污吏反藉以苛斂分

肥習染相沿病民實甚夫軍需供應定例本屬詳明地方有司何難詳稽例案妥爲遵辦乃開銷之浮冒則必託例而行供億之疲繁則多違例而取該員等清夜捫心其何以仰副朝廷愛民之意耶著各直省督撫嚴諭所屬嗣後凡遇兵差過境務須遵照定例辦理不准絲毫擾累如有縱容書役妄掣平民車馬指官勒索藉端苛派等弊一經發

覺卽將該官役等嚴叅治罪並將徇隱之上司議處決不寬貸至帶兵官弁尤應恪遵疊次諭旨嚴明約束經過地方不得秋毫騷擾倘敢不遵紀律或橫行街市欺侮商民或揭案鬩堂需索規費有一於此卽著帶兵大員查明叅奏按照軍法從事以肅戎行各直省督撫及各路帶兵大員其各公忠自矢務將州縣苛派將弁騷擾各弊嚴行禁止

以惠商民而除貪暴毋負諄諄之誥誠也

二十五日乙巳略秉章奏言石逆自長甯敗遁後

分路奔竄意欲牽掣我軍其前股竄至永甯經
總兵吳安康等出隊力戰骸逆勢不能支遂下
竄合江之先市場其中後兩股竄至敘永之得
用壩金鵝池一帶臬司劉嶽昭督隊追剿立將
賊巢燒燬賊遂連夜逃至馬嶺等處七月十二

日果毅等營分路進擣先市場賊巢知府劉德謙督隊沿河前進甫至場口賊衆撲出副將姚美倫被圍數重手刃悍賊數名力竭陣亡維時同知曾傳道督軍奪隘均被賊壘槍礮擊回傷亡勇丁百餘名賊見我軍驟進失利悉數猛撲曾傳道等分路堵禦該逆不敢進逼二十日紮木筏爲二橋以圖偷渡我軍開礮轟擊賊匪紛

紛搶渡人衆橋斷漂沒者以千計其未及渡河者四處藏伏當卽搜殺殆盡其已渡河者狂奔江津縣屬之白沙鎮時總兵唐友耕知府唐炯已率隊先至江津之鶴山坪扼要駐紮該逆折竄綦江縣屬之扶歡場等處其後股由仁懷竄至合江對岸之丁子場一帶劉嶽昭親督大隊由先市場渡河追擊該逆出悍賊數千拒敵並

伏賊於左右林箐中以爲抄襲之計我軍分三路前進槍礮齊施副將謝景春手刃騎馬賊目一名副將李盛貴等揮兵繼進分道追勦共計殺賊二千餘人潰賊趨至王家場復被我軍追斬二百餘名賊由三角場一帶逃竄查該逆沿川黔邊境避兵而行接踵下竄非循原路以窺涪州卽由南川以出彭水黔江仍回楚境除飛

咨湖南北兩省豫防要隘外臣已飭吳安康一
軍先至綦江以顧縣城復檄果毅等營馳赴涪
州以備截勦並催振武安定兩軍由江津直趨
扶歡場以爲橫擊之師劉嶽昭則督大隊掃蕩
而前以清後路至彭水黔江現有總兵周達武
所部楚勇已自湖北利川縣徑趨黔江以遏奔
軼至副將姚美命力竭捐軀懇

恩飭部照總兵例從優議卹同時陣亡之擬保遊擊黃仕貴等均請分別從優議卹奏入

上命議政王軍機大臣傳諭駱秉章曰石逆剽悍異常詭計百出此次進擣先市場賊巢墮其狡謀致有挫失嗣後務當慎益加慎謀定後動不致再爲該匪所乘方爲妥善著駱秉章督飭各軍悉心籌畫剿堵兼施爲一鼓聚殲之計毋令逆匪再得乘

閒竄逸

上諭內閣曰石逆由永甯縣下竄合江之先市場經
總兵吳安康出隊力戰逆勢不支其中股後股賊
匪竄至敘永之得用壩等處按察使劉嶽昭督隊
窮追立將賊巢燒燬該逆逃竄馬嶺等處後股復
由仁懷竄至合江對岸之丁子場一帶我軍分路
進攻共計斃匪二千餘人潰賊趨至王家場復被

我軍追斬二百餘名其在先市場殺賊力竭捐軀
之副將姚美侖著照總兵例從優議卹同時陣亡
之擬保遊擊黃仕貴馮廣勝守備王志誠擬保都
司鄧南恆擬保守備毛達楚擬保千總周桂清羅
全勝擬保把總周佩敏軍功馮名揚擬保外委李
太仁唐榮華守備劉安貴千總周葵忱蕭德懷蕭
同慈陶正義把總李長貴錢得勝外委劉品聚吳

永勝黃明高均著分別從優議卹

同日禮科給事中卞寶第奏言近聞幫辦軍務
水師總統黃彬安坐瓜州不理營務專以收取
沿江釐金侵吞肥己爲事縱容所部艇師攔江
劫掠商民貨物誣稱盜賊慘殺無辜上年六月
閒遊擊郭定猷帶兵在劉河地面擄劫商船殺
害良民數百人瓜分貲財十餘萬捏稟逆匪偷

竄北岸經官兵迎勦獲勝黃彬卽據以入告奏
請獎勵疊經被劫商民及被害家屬周姓等在
江蘇巡撫衙門控告有案甚至潛通逆匪接濟
賊糧本年三月二十三日有人赴瓜州軍營見
黃彬在船宴客聞卽粵逆渠魁五月初七日石
埠橋甫經投誠之賊在儀徵縣楊鍾琛公寓宴
飲門外擁進多人詢係黃彬水勇來尋該賊目

索取日前米帳是其平日濟賊已有明徵且聞有接濟賊米之船經民團查獲該鎮輒以搶案爲詞轉將民團懲辦又聞總兵李德麟分防靖江率領眷屬於通州城外十五里地方占住民房恣情聲色置師船於不問縱容所部兵勇滋擾居民又聞總兵陳國泰賴鎮海遊擊張瀚部下皆有通賊之事設一旦勾通北竄則揚通淮

海勢所必趨其間多宜稻之鄉產鹽之地一經蹂躪餉更難籌於軍務大有關繫相應請

旨飭下兩江總督曾國藩江蘇巡撫李鴻章將黃彬等通賊情事嚴密查辦並於彭玉麟楊岳斌黃翼升三軍中酌籌一軍奏替黃彬以固江北至吳全美戰陣雖勇而賦性貪猾紀律不嚴似未可保以專防之任奏入

上命議政王軍機大臣傳諭曾國藩李鴻章曰給事中卞寶第奏幫辦軍務水師總兵黃彬不理營務專以收取沿江釐金侵吞肥己爲事縱容所部艇師攔劫商民貨物誣稱盜賊慘殺無辜上年六月閒遊擊郭定猷帶兵在劉河地面擄劫商船殺害良民數百人瓜分貲財十餘萬捏稟剿賊大勝由黃彬入奏請獎疊經被害家屬周姓等在巡撫衙

門控告本年三月有人見黃彬在船宴客聞卽粵
逆渠魁五月內石埠橋甫經投誠之賊在儀徵縣
楊鍾琛公寓宴飲門外擁進多人詢係黃彬水勇
來尋該賊目索取米帳並有接濟賊米之船經民
團查獲該鎮輒藉詞搶案懲辦民團總兵李德麟
分防靖江率眷屬於通州城外占居民房恣情聲
色所部兵勇滋擾居民又聞總兵陳國泰賴鎮海

遊擊張瀚所部皆有通賊之事等語現在長江南
岸之賊時思偷渡江北正水師防剿喫緊之時若
委任此等劣員駐防江面必致與賊潛通消息勾
結竄越於江防大有關係著曾國藩李鴻章按照
所奏各款嚴密查辦務得確情如果通賊屬實卽
著於審明後以軍法從事另派賢員接帶師船將
不法弁兵勇丁嚴加裁汰整頓毋稍姑容原奏內

有以彭玉麟等三軍酌籌一軍接替之說黃翼升
彭玉麟現均分駐緊要江面隘口恐難移駛楊岳
斌一軍曾國藩本擬令赴下游江面現在患病是
否痊愈能否派令督帶艇師移紮下游江面此外
有無可派之員如何妥協布置之處著曾國藩李
鴻章悉心籌畫妥議具奏總期積弊悉除江防穩
固方爲妥善

二十八日

戊申

李續宜奏言接唐訓方來函該署

撫已於閏八月十三日自湖北啟行計二十日

後定可行抵安慶臣擬於閏八月二十六日起

程回籍料理臣母喪葬等事藉省臣父起居以

廣

聖主錫類之仁再臣接道員蔣凝學來稟苗沛霖於
八月間將壽州正陽關先後退出知該道於二

十一日已至壽州布置防守事宜查蔣凝學固
屬因勢利導而苗沛霖亦非漫無悔心前既擒
獻陳逆今又退出城關從此痛改前非臣自當
稱物平施飭部下各將寬其既往誘以自新冀
安各路反側之心而策叛練桑榆之效

同日戶部尙書羅傳衍奏言臣聞李續宜告假
後甯國廣德兩城相繼復陷袁甲三患病開缺

回籍就醫曾國藩營中兵勇疫氣傳染所傷萬計方今所恃以寒賊膽而安人心者惟有李續宜一員曾國藩以該員現丁母憂代爲奏請回籍治喪業經奉

旨允准俾遂孝思惟聽其拘守百日之期恐賊匪乘虛竄擾肆意蔓延相應請

旨飭下李續宜移孝作忠當以皖省軍務爲重無論

同籍曾否已滿百日迅卽回任以資控馭均奏
八

上命議政王軍機大臣傳諭李續宜唐訓方曰唐訓
方已由楚北啟行計日可到安慶該署撫抵皖後
李續宜務將地方情形及軍務應辦事宜詳細告
知以便接辦現在袁甲三已因病准其回籍馬新
貽接統臨淮軍務威望較輕唐訓方於安慶接篆

卽著速赴臨淮辦理毋稍延緩本日據羅惇衍奏
請迅飭李續宜回任已明降諭旨令該撫回籍後
將母喪趕緊辦理事畢卽行赴皖毋庸拘定假滿
始行回任現在皖北捻匪未平苗練甫經就範皖
南大股賊衆屬聚廣德官軍因水陸各營疫氣盛
行難於出隊正當防勦喫緊之時亟須得人而理
該撫務當仰體朝廷不得已之苦衷移孝作忠力

顧皖省全局以副委任

上諭內閣曰李續宜業已起程回籍著該撫到籍後趕緊料理喪事剋日旋皖任事務當移孝作忠毋庸拘定假滿始赴署任以重軍務

同日毛鴻賓奏言查趙福元全軍臣前奏擬調赴粵西昨接四川督臣駱秉章咨開石逆由四川合江竄入貴州仁懷該處東入酉秀與黔之

松桃思南楚南之永綏龍山楚北之咸豐利川
各府廳縣在在毗連賊情詭詐或回竄川境或
窺伺鄰封均未可定咨請檄飭沿邊文武嚴密
防堵等因是綏靖邊界又應扼要嚴防趙福元
一軍不得不暫留以爲西路之備至粵軍應援
或由趙煥聯營中兵勇分出數營交王永章統
帶入粵相機夾擊以期迅掃賊氛奏入

上命議政王軍機大臣傳諭官文駱秉章嚴樹森毛
鴻賓韓超曰石逆由四川竄入仁懷該處東入西
秀與黔之松桃思南楚南之永綏龍山楚北之咸
豐利川在在毗連逆情詭詐百出非回竄川省卽
擾害鄰封前諭駱秉章悉心籌畫堵剿兼施爲一
鼓聚殲之計著懷遵前旨督飭劉嶽昭等分投堵
剿毋令乘閒竄逸並著官文嚴樹森毛鴻賓韓超

於連界各處多設偵探飭地方官實力防範務期
不分畛域合力剿除以清積年巨患趙福元一軍
卽飭探蹤剿擊毋得株守一隅以資得力

二十九日己酉多隆阿奏言髮逆大股前經臣督

兵在荊子關痛加擊剿敗匪由浙川李官橋沿
河竄入楚境刻下均州光化隨州棗陽等處均
爲賊擾該逆雖屢經懲創而人數衆多又無巢

集賢堂卷三十二
三
穴難保不筵而走險楚省存兵無幾深爲焦灼
頃奉

諭旨飭臣令金順雙福穆圖善等軍會合堯勳臣惟
有恪遵

聖訓迅速移軍前進併力齊擊以期聚而殲旃奏入
報

聞